



ՀՈՐԵԼՅԱՆԱԿԱՆ ՏՈՆԱԿԱՏԱՐՈՒԹՅՈՒՆ ԵՎ ԽՈՐՀՐԴԱԿՑՈՒԹՅՈՒՆ ԵՐՈՒՍԱՂԵՄԻ ՀԱՅՈՑ ՊԱՏՐԻԱՐՔԱՐԱՆՈՒՄ

1980 թվականի ապրիլին մահվան հիւճառյակն էր Երուսաղեմի հայոց պատրիարք, լուսահոգի և մեծանուն Ս. Եղիշե արքեպ. Դուրյանի (1921—1980) և ծնընդյան երկուհարյուրամյակը դարձյալ, Երուսաղեմի երջանկահիշատակ Ս. Զաքարիա պատրիարք Կոփեցու (1840—1846), որը 1843 թվականին հիմնադիրն էր եղել Երուսաղեմի հայոց վանքի ժառանգավորաց վարժարանի:

Սույն գույգ հորեյանների առիթով Երուսաղեմի հայոց ամենապատիվ Ս. Եղիշե Տերտերյան սրբազան պատրիարքի նախաձեռնությամբ և հովանավորությամբ հորեյանական տոնակատարություններ և հոգեվորականների խորհրդակցություն են կատարվել Երուսաղեմի հայոց վանքում օգոստոսի 3—10 օրերին:

Հորեյանական հանդիսություններին պատրիարք սրբազան հոր կողմից հրավիրվել էին «Ժառանգավորաց վարժարանին աջակերտած բոլոր հոգևորականները, հանդիսավորապես տոնելու համար հորեյանը ժառանգավորաց վարժարանի հիմնադիրն և Մեծ Աղետեն հետո նույն վարժարանը վերաբացողին»:

Հանդիսությանը ներկա են եղել Թուրքիայի հայոց Ս. Շնորհք պատրիարք Գալուստյանը, Ս. Սիոն, Ս. Սերովբե, Ս. Հայրիկ, Ս. Պասկ, Ս. Կոմիտաս, Ս. Թորգոս, Ս. Ծահե, Ս. Տիրայր, Ս. Զավեն, Ս. Գարեգին արքեպիսկոպոսները, 26 վարդապետներ և արեղաներ ու 8 քահանա հայեր:

Խորհրդակցությունից առաջ իր ապրիլ 5

թվակիր նամակով Ս. Եղիշե սրբազան պատրիարքը տեղյակ էր պահել Ամենայն Հայոց Հայրապետին՝ «որ խորհրդակցական ժողով պետք է գումարվի, մասնակցությամբ ժառանգավորաց վարժարանի նախկին սաներուն, քննարկելու համար մեր Եկեղեցիին ներքին հարցերը, նյութ ունենալով «Մեր Եկեղեցիին առաքելությունը այսօր...»: Վեհափառ Հայրապետը ոգևորությամբ ողջունեց այս նախաձեռնությունը և իր կողմից նշանակեց չորս պատգամավորներ, բոլորն էլ Երուսաղեմի նախկին սաներից, այդ թվում՝ Ս. Սիոն արքեպ. Մանուկյանը, Ս. Կոմիտաս արքեպ. Տեր-Ստեփանյանը, Ս. Հովհաննես ավագ քին. Մարությանը և Ս. Մովսես քին. Ղազարյանը, որոնք մասնակցեցին Երուսաղեմի միաբանական խորհրդակցական ժողովին:

Միաբանական ժողովը գումարվել է Ալեքս-Մարի Մանուկյան ժառանգավորաց վարժարանի և ընծայարանի նորակառույց հանդիսությանը սրահում:

Ժողովը բացվում է ամենապատիվ Ս. Եղիշե սրբազան պատրիարք հոր աղոթքով: Ապա տեղի է ունենում ժողովի դիվանի ընտրություն: Ատենապետ է ընտրվում Ս. Սիոն արքեպ. Մանուկյանը: Ընտրվում են նաև ժողովի քարտուղարություն, հանձնաժողովներ և խմբագրական մարմին:

Խորհրդակցությանը փոխանփոխ նախագահում են Երուսաղեմի և Թուրքիայի հայոց սրբազան պատրիարքները:

Ժողովի բացումից և դիվանի ընտրությունից հետո առաջին խոսքը տրվում է Դերագույն հոգևոր խորհրդի անդամ և Ա-

բարատյան հայրապետական թեմի առաջնորդական փոխանորդ Ս. Կոմիտաս արքեպ. Տեր-Ստեփանյանին, որն ընթերցում է Հայոց Հայրապետի 28 հուլիս թվակիր ուղղության խոսքը՝ ուղղյալ միաբանական համագումարին (Հայոց Հայրապետի խոսքը հրատարակվել է «Էջմիածին» ամսագրի սույն համարում, էջ 3):

Համագումարն իր որդիական երախտագիտությունն ու շնորհակալությունն է արձանագրում հայրապետական հոգեւէն ու բովանդակալից խոսքի համար, և, համուն բոլոր ժողովականների, Ս. Եղիշե և Ս. Շնորհք պատրիարքները Մայր Աթոռ են ուղարկում հետևյալ հեռագիրը.

Ն. Ս. ՕՇՈՒԹՅՈՒՆ Ս. Տ. ՎԱԶԳԵՆ Ա.
ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Ս. Էջմիածին

Ժառանգավորաց վարժարանի հոգևորական քառասունհինգ սաները հավաքված երուսաղեմի վանքին Ասեքս և Մարի Մանուկյան արհիմ մեջ, հարգանքով ունկընդրեցին Ձերդ Վեհափառության պատգամը: Ուրախությամբ և խանդավառությամբ լեցվեցան մեր հոգիները լսելով Ձեր հայրական խոսքը, թելադրությունները, մտահոգությունները և հույները՝ բխած Եկեղեցվո սրտեն և հայրենիքի երազեն: Կվտահեցանք Ձերդ Վեհափառությունը թե Ս. Էջմիածինի խորհուրդը և հայրենիքի զգացումը ուղեցույցն են մեր խորհրդածություններում:

Որդիական ակնածանք՝

ԵՂԻՇԵ ՊԱՏՐԻԱՐԿ
ՇՆՈՐՀԷ ՊԱՏՐԻԱՐԿ

Այնուհետև ժողովը զբաղվում է օրակարգի հարցերի քննությամբ և «գլխավորապես այս օրերու մեր Եկեղեցիի առաքելությամբ: Ավետարանի քարոզությամբ սերմանված հավատքը, Ս. Գրիգոր Լուսավորչի Աջով սրբազործված Մյուռնը, Արարատյան հողին վրա կանգնած լույսի խորան Ս. Էջմիածինը, մեր հայրերու անխախտ հավատարմությունը Քրիստոսի փրկագործ խաչին, զծեցին հայոց պատմության իրական ուղին առ Աստված բարձրացող: Կենսունակ պահել մեր հայրերու հավատքը և ամրապնդել մեր ժողովուրդի հավատարմությունը Ս. Խաչին և Ս. Ավետարանին, եղավ ժողովականներու խորհրդածություններում կարգախոսը:

Բոլոր ժողովականների սրտի բուռն բաղձանքն է եղել մեր Եկեղեցու դերին գորա-

ցումը ա՛յսօր հայ կյանքից ներս: «Եկեղեցիին ներազդեցությունը,—նշել են ժողովականները իրենց մտահոգությունների մեջ,—հայեցի կրթության մեջ և կապը իր ժողովուրդին հետ թուլցած է»: Ժողովական հայրերը միջոցներ են որոնել «այսօրվան պայմաններում մեջ ամրապնդելու համար հավատքը ի Քրիստոս և մեր ժողովուրդին ուխտը առ Աստված, կնքված մեր նահատակներու արյունով»:

Խորհրդակցության ընթացքում, օրակարգի հարցերի քննարկման ժամանակ, համագումարն արձանագրել է նաև «հոգևորականության զանցառումները իրենց պարտականության մեջ: Անկարգություններ, անկանոնություններ, կազմակերպության պակաս, անհամադրություններ, գործակցության թուլացում և այլ թերություններ նշվեցին իբրև իրականություններ, որոնց դարմաններ պետք է որոնել»:

Ժողովում նաև «կարծիքներ արտահայտվեցան Եկեղեցիին ներս գերիշխող աշխարհականացած մտայնության մասին, որ արդյունքն է Եկեղեցիին դուրս գտնվող կազմակերպություններու ազդեցության, վնասելու աստիճան հավատացյալներու և եկեղեցական իշխանության համերաշխ գործակցության»:

Այս մտածումների լույսի տակ «անհրաժեշտ նկատվեցավ ստեղծել կանոններու նոր հավաքածո մը, որ ճշտե իշխանության զանազան աստիճանները ազգային-եկեղեցական կյանքեն ներս, սահմանե նոր կանոններ մեր ժամանակներու ընկերային և բարոյական կյանքին պարտադրած հարցերում պատասխանելու համար, նպատակ ունենալով սնվաթար պահել հայ նկարագիրը և պաշտպանել մեր ժողովուրդը՝ օտարացման վտանգին դեմ»:

Համագումարն անհրաժեշտ է գտնում նաև ստեղծումը «մասնագետ եկեղեցականներե և աշխարհականներե մարմինի մը, պատրաստելու համար Հայաստանյայց Եկեղեցվո կանոնագիրք մը», լրթ կետերից բաղկացած, որն ընդգրկի «Հայ Եկեղեցու հանգանակը, ապա ծիսական, վարչական, հոգևորականության և աշխարհականների իրավունքների վերաբերյալ կանոններ, բարոյական և ընդհանուր կանոններ»:

Ժողովում մասնավոր ուշադրությամբ քննարկման նյութ են եղել «հոգևորական ասպարեզին կոչված թեկնածուներու և առհասարակ հայ դպրոցի աշակերտի կրոնական դաստիարակության պարագաները»:

Համագումարը ցավով հաստատում է, որ «մեր ժողովուրդը անհատորդ կմնա հայ ծեսին և արարողության և հետզհետե կնվազի

Եկեղեցիի պաշտամունքներուն մասնակցողներու թիվը»:

Ժողովական հայրերը «զգացին անհրաժեշտությունը լավագույն կերպով և իրական ապրումով կատարելու խորհրդակատարությունները, աղոթքին կարևորությունը և մեր ժողովուրդին աղոթել սովորեցնելու անհրաժեշտությունը»:

Այս առթիվ քննության առարկա է դարձել «Աղոթագրքի և Մաշտոցի պարունակության հետ կապված հարցեր և եղանակները թելադրություններ հայ ծեսը ավելի մատչելի, հասկնալի, ներշնչող և սիրելի ընծայելու համար»:

Միաբանական համագումարը, արտահայտելով ողջ հայ ժողովուրդի արտագին բաղձանքը, շեշտում է կարևորությունը «1915-ի ցեղասպանության զոհերու սրբացումին և անոնց նվիրված աղոթքներու և շարականներու հորինումին»:

Այս մտահոգություններով համագումարը մե՛ր օրերին ևս «զգաց թե Եկեղեցին պետք է շարունակե ազգային իր դերը... և մեր ժողովուրդի և Եկեղեցիի միության հեռանկարը տեսավ Ս. Էջմիածնի Մայր Աթոռի պայծառացման և ներկա հայրենիքի հառաջդիմության ճամբով»:

Միաբանական ժողովը զբաղվել է նաև 1956 թվականից ի վեր սփյուռքում Հայ Եկեղեցու մարմնի վրա բացված վերքի քննությանը և մաղթել, որ «վերջ գտնեն Կիլիկիո Աթոռին ոտնձգությունները և վերահաստատվի Հայց. Առաքելական Սուրբ Եկեղեցիի միությունը, Ամենայն Հայոց Կաթողիկոսության հոգևոր հեղինակության ներքև»:

Հոգևորականաց համագումարն իր աշխատանքներն ավարտում է օգոստոսի 10-ին:

Սույն համագումարը որոշում է «իր խորհրդակցություններու արդյունքը ենթարկել Ամենայն Հայոց Հայրապետի հավանության և տնօրինության»:

Ժողովի լիազումար միստերից բացի ստեղծվում են նաև յոթ մասնավոր հանձնաժողովներ, որտեղ քննության են առնվում այս առթիվ պատրաստված բովանդակալից զեկուցումները:

Հանձնաժողովները մտքերի փոխանակություններից հետո իրենց քննության արդյունքները կամ տեղեկագիրները բերում են լիազումար միստին ի հաստատություն:

Օգոստոսի 3—10 օրերին, հոբելյանական տոնակատարությունների և խորհրդակցությունների ժամանակ, ընթերցվում են հետևյալ բանախոսություն-զեկուցումները՝

1. **Տ. Եղիշե պատրիարք Տերտերյան**, «Հայ Եկեղեցիի ազգային նկարագիրն ու դերը»:

Տ. Եղիշե պատրիարքի սույն բանախոսությունը տպագրվել է «Էջմիածին» ամսագրի սույն համարում, էջ 11:

2. **Տ. Ծնորհք պատրիարք Գալուստյան**, «Կարգ և կանոն»:

Տ. Ծնորհք պատրիարքի սույն բանախոսությունը ևս տպագրվել է «Էջմիածին» ամսագրի օգոստոսի համարում, էջ 19:

3. **Տ. Սերովբե արքեպ. Մանուկյան**, «Մեն և արարողություն»:

4. **Տ. Թորգոմ արքեպ. Մանուկյան**, «Հայ կրոնական դաստիարակությունը անցյալին և այսօր»:

5. **Տ. Զավեն արքեպ. Չինչիկյան**, «Արտասահմանյան պայմաններու ազդեցությունը Հայ Եկեղեցիի ավանդական կարգ ու սարքին վրա»:

6. **Տ. Փառեն ծ. վրդ. Ավետիքյան**, «Զաքարիա պատրիարքի անձը և գործը»:

7. **Տ. Իսահակ ծ. վրդ. Ղազարյան**, «Եղիշե Դուրյան սրբազանի անձն ու վաստակը»:

Երուսաղեմի հայոց պատրիարքության եկեղեցական սույն համագումարի ավարտին ատենապետ Տ. Սիոն արքեպ. Մանուկյանը, հանուն բոլոր ժողովականների, շնորհակալության և գնահատանքի խոսք է ուղղում ամենապատիվ Տ. Եղիշե սրբազան պատրիարք հորը, որը «նախաձեռնողն ու հովանավորը եղավ համագումարին»:

Համագումարի օրերից հետո շքեղ հանդիսությամբ Երուսաղեմի հայոց Սրբոց Հակոբյանց վանքում կատարվում է երջանկահիշատակ Տ. Զաքարիա պատրիարք Կոփեցու ծննդյան 200 և լուսահոգի Տ. Եղիշե պատրիարք Դուրյանի մահվան 50-ամյակին նվիրված հանդիսությունները:

